

5. Braška być na tymle kwasu stary baćon dyrbješe: tón njej' khromy na tu frasu, nad sto młynow klepoce.

6. Kucheń je měł wroběl twarić, škrěkawa bě myjeřka, kurotwa jim přińdže warić, kuchařka kaž wojeřka.

7. Sowa, hlej, ta lesna žona, ta bě slónka nje-wjesće; z nawoženju džěše wróna, kmótra rjana zawěšće.

8. Z Wrónic džowku měle družčić žołma, kawka, kabija, šćihlica kwas dyrbi spuščić, wo nju so tam zabija.

9. Čarš a škórc tam swataj běštaj, taj naj-rjeńšej pacholaj, z hłowu wijo pyšnaj džěštaj před wšěmi we frakomaj.

10. Hupak wjele do so dzerži, přinjese tym družkam pić, wokoł' njeho stajnje smjerdži: nje-chychu z nim rejwać hić.

11. Štyrjo hercy tež tam běchu. Łastojčka bě na husle; hdyž pak woni piskać chychu, njemějachu pišćele.

12. Konopačk dže bě na dudki, škowrončk přińdže z piščelu, mały kralik bě samlutki z kózłom při tym wjeselu.

13. Čorny kós pak bě so wopił a z nim młoda pocpula, běše wšitkón palenc dopił tuž joh' swari čapula.

14. Kanja poča k dobrom' radzić, dokelž běše słyšała, cyžika zo chcedža sadzić: na smjerc bě so spłóšała.

15. Při tym sta so wulka zwada: sknadžik klesny sykorku; tu bě trjeba dobra rada; ročk zas' hrabny za zybu.

16. Šěračk poča wšitkich wabić, to je wulcy sylny muž, chcyše šěru plišku zabić, wućeže sej na nju nóż.